

Dorothee (Bolliger)

Sie weiss immer was grad louft
 Wär me wenn & wo het touft
 Wär sis Outo het verchouft

Wär mit wäm esch dörebrönt
 Wär haub nackt um d'Hütte rönt
 Wär me vöu z'fescht heig verwöhnt

Wär sich schiins heig use bschlosse
 Wär sich geschter heig verschosse
 I der Zytig stöig no nüt

Sie isch aune e Schritt vorus
 Wenn's News git, de het se sie
 & s'git immer News

Dorothee – Dorothee Hueber
 Dorothee, bekannt ir haube Stadt
 Dorothee – Dorothee Hueber
 Dorothee, üses Regioboulevardblatt
 Sie isch täglech up to date
 Sie weiss sowieso was s'vertreit
 & sie weiss immer was sie seit
 Omeloseineziehguetverpackewytergäh

Mit Lyb & Seel isch sie derbi
 We sie cha brichte, was isch gsi
 Oder villecht trifft's ou erscht no i

Sie meint's nie bös, sie meint's nid zynisch
 Ou wenn's mängisch chli intim isch
 Me weiss ou afe, wie sie's meint

& dass dr Metzger vom Quartier
 Liit födleblutt uf sim Klavier
 Söu är doch mache was är wott

Paris (Bolliger)

D'Wouke si am platze
 Dr Alarm wiest of Sturm
 Aus hebt sich fescht
 Aber i lo logoh
 Ha mi vöu z'lang verchroche
 Ha so s'Schwiege verleht
 Mir hei üs d'Liebi verschproche
 Si uf d'Nase gheit

Stiige abe dür d'Fluete
 Schwümme use i Tag
 & wenn i dört nid versuufe
 Hol i mir no n'e Nacht
 So wie du mer hesch wöue
 So wott i dir nid
 & wenn geschter scho morn wär
 Wär i hüt nümm bi dir

I loufe dür d'Strasse
 Irgendwo zwüsche de Champs-Élysées
 & em Moulin-Rouge
 I loufe dür d'Strasse
 Aber i finde
 I finde di Bahnhof nid
 I wär gärn de Heime
 & zwüsche üs
 Zwüsche üs wär aues wieder klar
 I nohm di i d'Arme
 Du chiemsch ändlech ab dim Eifutorm
 & i us mim Palascht

Wo n'är sie s'erscht Mou het gseh
(Wyss/Bolliger)

Wo n'är sie s'erscht Mou het gseh
 Sich verliebt het i sie
 Het er ghofft, dass är glii
 Nümm elei wird si
 So wie sie ihn het visiert
 Het är sofort kapiert
 Är het nid lang überleit, isch zue're häre
 gange
 Het gfrogt: «Säg bisch elei?
 Wenn wottsich bring i di Hei»

So wie die Gschicht damals agfange het
 So schnäu isch sie jetzt wieder z' Änd
 Sie hei drüü, vier Mönnet jede Tag
 Fascht jedi Nacht mitnand verbrocht
 Sie hei ghofft, dass das wo sie zwöi hei
 Ewig so wird si
 Doch d'Ewigkeit, hei sie gli gmerkt
 Isch so schnäu verbi
 Z'erscht hei sie mou e Pouse gmacht
 Nächhär hei sie nomou gluegt
 Är hätt no wöue, sie het nid
 Drum hei sie sich de trennt
 Wenn z'Nacht aube die Tröim si cho
 Wie aus agfange het
 Het är ghofft s'wärd wieder so wie denn...

Für sie isch är Vergangeheit
 Sie het scho lang en andere gha
 Mit ihm het sis fascht es Jahr vertreit
 Nächhär het sie n'e verlo
 Wo n'är vo däm erfahre het
 Het är wieder Hoffnig gha
 Sie het sich ab ihm höchschtens gnärvt
 Är het gmeint sie lieb n'e no
 Sini Fründe hei sich mängs aglost
 Hei gseit gsehs ändlech i
 Das isch nid die, wo zu dir passt
 Drum lo sie ändlech los
 Nume är het vo all däm nüt wöue wüsse
 Het witer für sie gschwärmt
 Är het ghofft s'wärd wieder so wie denn...

Neulech i der gliiche Bar
 Wie vor ungefähr zwöi Jahr
 Sie stohet elei am n'e Tisch, är irgendwo i de
 Lüüt
 Wo n'är sich umdräiht, wieder zu ihre luegt
 Gseht är grad wie n'e Typ uf sie zue goht
 Sie aschpricht mit ihre flirtet und dass sie
 ihm schöni Ouge macht

Du chasch mis Härz ha (Bolliger)

Letscht Wochenänd bin i chli i d'Beize
 Ha nume wöue goh mi Goume reize
 S'isch nid lang gange, bis i di ha gseh
 Ha lang überleit aber getrou ha n'i mi nid
 i ha di ganzi Woche mi versuecht abz'länke
 Trotdäm muess i durent a di dänke
 Jetzt stoh n'i vor em Spiegu & üebe dä
 Satz:
 Bitte bitte bitte werd mi Schatz

Du chasch mis Härz ha, solange em guet
 luegsch
 Du chasch mis Härz ha, solange em guet
 tuesch
 Du chasch mis Härz ha, solange es für di
 schlot
 Du chasch mis Härz ha

E Woche spöter im gliche Spunte
 Mis Härz wott mir fascht zur Bruscht us
 gumpe
 Hocksch doch du am Tischli näbedra
 Schöttlich dini Hoor & lachs mi a
 E hole no es Bier & werde langsam zue
 Stoupere & gheie genau vor dini Schue
 Du höufsch mir wieder uf & frogsch mi wär i
 bi
 I bi dä wo verlore isch a di

Chumm use (Bolliger)

D'Vögu pfiere wieder & s'Gras tuet schmöcke
Sogar d'Sunne tuet sich jetze nüm
verstecke
D'Nächt wärde wärmer & d'Mörge früsch
I de Gartebeize tüe sie wieder use tische
& d'Lüüt die chömme, sogar die schöne
Sie tüe ihne aute Laschter fröne
Tüe diskutierte öpis konsumiere
Nume du hockscho no Dehei & machsch e
Schtei

Chumm doch use...

Wöu d'Badi tuet sich nämlech wieder fülle
D'Lüüt träge Jeans Bikini Sonnebröue
Hüt z'Obe spöut i dr Metro e Band zum
Tanze
A der Aare tüe es paar es Ffüürli pflanze
Si tüe chli höckle tüe grilliere
Schtusse quatsche philosophiere
Denn aus wott weder läbe nüt wott hebe
Nome du hockscho no Dehei & machsch e
Schtei

Chumm doch use
Was wottsch du immer Dehei
Chumm doch use
Was wottsch scho wieder elei
Chumm doch use
Mach bitte ned so ne Schtei
Chumm doch use...

Weisch no wie mir denn wo mir bis i
Schache
Mit em Gummiboot si cho hei müesse lache
Nie würd i das gloube wenn e's säuber nid
hätt gseh
Mer hei die haubi Nacht lang gsunge & du
vorab derbi
Mir si no mängisch mit Fründe a d'Aare abe
gange
Oder eifach i d'Stadt chli goh umehange
Mer hei üs immer wieder gschwore dass es
immer so wärd si
Mer hei no lang dervo verzöut säg isch es
würklech verbii

Wohnig (Bolliger)

D' Wänd si gäub uf em Tischli esch es
chläbig
Im Schrank si s' Mäuh & d' Hörnli scho läbig
Im Chüeschrank louft mir dr Salami dervo
& dr Champignon macht sich über s'Jogurt
här

D'Schiissi isch dured vo irgend welchne
Chäfer bsetzt
Dr Spiegu liit im Lavabo & dr Tod het sich
d'Sense gwetzt
Wöu aues wo n'i mache bringt me i Atemnot
& aues Danke louft sich sowiso z'Tod

Dört e Rächig do e Mahnig irgendwie ha n'i
überhoubt kei Ahnig
Wie n'i se söu zahle weiss nüm wo spare
s'Telefon hei si ou abgschtöut & dr Färnseh
ha n'i verchouft
& s'Fänschter bring i nümme uf drum weiss
i nüm was louft

Hey mach doch dir kei Chummer
Mi interessiert dis Puff de Heime nid
Was wottsch jetzt äxtra
Nume wöu i zu dir chumme
Dr Bode ufzieh
D'Fänschter putze & d'Stube suuge
I chumme nume wäge dir
& nid wäg dire Wohnig
I wott di nume cho bsueche
& nid bi dir iizieh

Dr Wasserhahne tropft scho lang i dr Chuchi
liit dr Duschvorhang
Wo ds letschte Mou isch abe cho wöu i
usgrütscht bi & mi ghebt ha dra
Irgendwie flüüege überau gruusigi chlini
Viecher
I mire Wohnig umenand & d'Zahl wird
immer riicher

Im Briefchaschte dunde het's es Couvert i
dr Poscht
I heigi öppis gwunne & söu mi mälde wenn i
s'wott
Es Los heig das entschiede aber i ha nie
öppis igschickt
Wenn i dä Brief mit ufe nimme de find n'e
nähhär wieder nüm

Vada (Bolliger)

I weiss no genau wie du dört
Mir dr letschi Kuss uf d'Stirne drückt hesch
Bi nächtelang wach gläge
Du bisch mir nüm usem Sinn
Irgendeinisch han is de gmerkt
Dass i vo mire Bahn völlig abcho bi
Du gohst hüt nach Wescht
Und i nach Oscht

Zwüsche Glücksfall und hartem
Schicksalsschlag
Schiint e Gränze meischtens völlig klar
Wenn meinsch, du heigisch d'Gränze gseh
Isch si plötzlech niene meh...

Ha scho mäenge Verluscht müesse
Über mi lo ergoh
Aber jede vo dene het mi
Mit em Faktor Zyt nähhär stercher gmacht
Wär mängisch gärn zue dir zrug cho
S'het mi so mängs gröit
Hüt beni froh bin i denn
Nid mit dir wäg

Aber du (Bolliger)

I wett dis Ffüür uf de Lippe
Dr Summer i dim Schoss
Dr doppuschtländig Zungekuss

Du hesch mir so gfaue wie am Falter s'Ffüür
I bi uf di gfloge & ha me verbrönt
Wenn du dört bim warte nid so heiss wärsch
gsi
Wäri s'Flüüege für mi villecht nid verbii
Du hesch mi wunder gno i ha um di gworbe
Für di isch das es Frässe gsi du hesch mi
verdorbe
Mit dir wöue einig z'si das isch es schwierigs
Los
Du besch chaut im Chopf & heiss im Schoss

Du aber du bisch mis A & O
Chönnti für öpper brönne wärsch es ganz
klar du aber
Du aber du weisch gar nid was i wett
Trotzdäm würsch du heiss uf mi speziell &
ou adrett

E riesegrosse Spiegu gäu dä hangt a dyre
Wand
Du frogsch ne jede Morge wär die
schönschti sig im Land
Dass är dir nid cha Antwort gäh das trifft de
ziemlech noch
Doch bi sövu Schönheit verschlot's jedem
Spiegu d'Sproch

Wyt vo de Hei (Bolliger)

Nöii Gsicht, e nöii Stadt
Niemer wo mini Sproch verschtobt
Niemer wo mi kennt
Überhaupt gar niemer wo mi bim Name
nennt

Wyt vo de Hei
Gliich nid elei
Wyt a däm Tag verbii
Wo n'í hätti wóue de Heime si

Dr Mond dä zieht dür anderi Wouche
Mis Lieblingslied tönt no gliich
Die aute Gfüeh
Fahre mir wieder ii

Chuum isch's Tag chunnt scho wieder
d'Nacht
Wo s'Läbe do vöu eifacher macht
Es stresst di niemer & nüt i däm Land
Nome Zyt zerrönnt wie n'ée Hand vou Sand

S'get nüt wo mir fäuh
Weder Fründe no Gäud
Höchstens dass i
Di nid bi mir ha...

Novämber (Bolliger)

Dr Schatte wird länger & Tage wärde knapp
Müed & versängt wie n'ée blüetlose Mai
Dr Mittag schliicht dür d'Wäuder bluetläär &
schwach
Bout sich dr Mond i de vernäblete Dächer es
Näscht

Baud git's Schnee & s'wird Novämber
So wie denn wo du bisch gange vo do
S'goht nümm lang & s'wird Novämber
Glii scho stohsch du wieder do

Mir hei üs zwöi oder drüü mou gschribe &
öppe vier mou telefoniert
Du hesch gseit es zieh di langsam Hei
I ha nie gwartet aber mängisch a di dankt
Was ächt grad machsch & wo ächt öppe
bisch

Venus (Bolliger)

Säg stohsch scho weder a dim Fänschter
Luegsch mit em Färnglas use i d'Nacht
Öb am Himmuszäut en aute
Längscht erloschne Schtärn
Sini Ufmerksamkeit wieder uf di länt
Oder scho n'ée nöie für di schiint

Gäu liisch nächtelang im Bett
Regsch di uf wöu nid chasch penne
Dass di dis schlächte Gwüsse plogt
Gäu das hättsch du denn nie dänkt
Dass e Schtärn i dine Händ so schnäu
verglüeht
& jetzt machsch Jagd scho uf e nöchsch

A dir isch s'Zentripetale - s'Fatale

I bi d'Venus
& i kurve im ne änge Kreis um di
& wenn mi nümm aziehsch
Wird d'Fliehchraft z'gross
& wenn mi nümm aziehsch
Lo n'í eifach los
& de spickts mi us dr Bahn
De suech i mir e nöii Sonne
Schiin du nume chli für d'Chatz
I sueche mir e nöie Schatz

Säg lesisch immer no die Buecher
Über die Chapsle usem All
Wo vo n'ere färne Galaxie
Äxtra bi dir lande & di wärde rette
Di entfuehre is Paradies
Was meinsch was hei si ächt für ne Priis?

No immer i mir (Bolliger)

I loufe so dür d'Stadt
Ha dr Chopf nid bi dr Sach
Tube chöme gförlech nöch
Plötzlich het eini fascht
Ihre Chopf under mini Füess
Aber i halte Kurs - i überlege
So wie i dir denn
Zu Füesse gläge bi
Hättis mi fascht
Dr Chopf chönne choschte
Aber du i dire Art
Hesch es eher gmerkt

I weiss no genau wie n'í gwartet ha
I dr Hoffnig chämisch zrug
Aber nach zwe drei Täg han i gwüsst
Das Mou göuts ärscht

I danke no öppe
A die Zyt denn mit dir
Weisch no wie mir's schön hei gha
Wenn mir noch emene Stritt wieder d'Liebi
hei gschpürt
Wie mängisch hei mir d'Stunde zöut
Wenn mir nid si zäme gsi
I chli öppis han i bi dir glo
& öppis vo dir isch no immer i mir

I hocke a mim Bürotisch
Wüehle i mim Puff
Weiss nümm was i gsuecht ha gha
Plötzlich do e Brief
In liebevoller Schrift
I gloube dr erscht vo dir
I grabe noch chli wyter
& gseh wär hätt das dankt
Ferie in Lissabon
Uf emene Album schön designt
I schlo die erscht Syte uf & weiss
Do chläbt no e Foti vo dir...

Palme (Bolliger)

Palme Strand 40. Grad am Schatte blaue
Himmu Hängematte
Wysse Sand & klari Wasser me gloub's
fascht nid kei Troum sig krasser
Churzi Nächt längi Täg irgendwie sige aui
zwäg
Dr Coup à deux dä schmöcki fein d'Drinks
sige besser aus Deheim

Höt Morge han e die Nachrecht übercho
E Poschtcharte us der nöchi vo Hilo
Dr Kurt dä het mir gschriebe, es sig nid
übertriebe
Uf dr Wäut sig's ganz sicher niene so...

Do häre sött i ou mou goh i chöig dr Stress
de Heime lo
Är chöig das fascht nid verschtob: «Säg was
wottscht Deheime no?»
Fascht jede Tag chömm ihm vor
Wie ne Ort wo me nume äne cha
Wenn me s'vermaa

D'Sunne schiint & s'Wätter stimmt die
Ygeborne syge fründlech gsinnt
Är wett's nid misse um kei Priis Sunnecrème
bruuchsch schiins literwys
Mängisch bechummi aube wieder e Charte
Mit liebe Grüess & uf was dass i eigentlech
warte...

I hätt so gärn es Ticket wett scho hüt nach
Übersee
Ha ke Stutz ke Zyt ke Ferie aber merci für
d'Idee...